



KENYATAAN MEDIA JABATAN ALAM SEKITAR

ISU AKSES DAN MUAT TURUN LAPORAN PENILAIAN KESAN KEPADA ALAM SEKELILING (EIA)

Jabatan Alam Sekitar (JAS) mengambil maklum berhubung laporan media berkaitan isu akses dan muat turun Laporan Penilaian Kesan Kepada Alam Sekeliling (Environmental Impact Assessment – EIA).

Pengurusan dan pengendalian dokumen EIA dilaksanakan selaras dengan peruntukan di bawah Akta Kualiti Alam Sekeliling 1974 [Akta 127], peraturan-peraturan berkaitan serta prosedur operasi yang ditetapkan oleh Jabatan Alam Sekitar.

JAS ingin menegaskan bahawa laporan penuh EIA tidak disediakan untuk dimuat turun secara terbuka bagi memastikan pematuhan terhadap aspek perlindungan hak milik intelektual, hak cipta dokumen teknikal, keselamatan maklumat serta kepentingan keselamatan negara. Laporan EIA lazimnya mengandungi maklumat teknikal terperinci termasuk data lokasi strategik, infrastruktur kritikal, pelan pembangunan, koordinat tapak dan maklumat sensitif lain yang memerlukan kawalan akses sewajarnya.

Walau bagaimanapun, selaras dengan prinsip ketelusan dan hak orang awam untuk mendapatkan maklumat berkaitan alam sekitar, JAS membenarkan Laporan diakses sepenuhnya sama ada secara dalam talian atau fizikal di lokasi pada tempoh semakan yang ditetapkan bagi tujuan penelitian serta maklum balas awam semasa peringkat penilaian laporan dilaksanakan. Selain itu JAS masih menyediakan akses kepada

Ringkasan Eksekutif Laporan EIA untuk rujukan umum melalui platform yang ditetapkan berdasarkan permohonan yang dikemukakan.

Pendekatan ini dilaksanakan bagi memastikan keseimbangan antara kepentingan akses maklumat awam, perlindungan dokumen teknikal serta pematuhan kepada keperluan perundangan dan keselamatan negara.

JAS akan terus memperkukuh tatacara pengurusan dokumen EIA secara bertanggungjawab dan profesional selaras dengan bidang kuasa Jabatan dalam memelihara kelestarian alam sekitar serta kepentingan awam.

JABATAN ALAM SEKITAR

14 MEI 2026



Unit Komunikasi Korporat I Jabatan Alam Sekitar (JAS)
Tel. : 03-8000 8000 I Faks : 03-8889 4763